

四庫全書

集部

欽定四庫全書

集部

海壑吟稿卷八七

詳校官檢討臣劉忻

侍讀臣孫球覆勘

總校官編修臣倉聖脉

校對官學正臣翁樹棠

謄錄監生臣王宮

欽定四庫全書

海壑吟稿卷七

賦

明 趙完璧 撰

寒宵賦

海壑子讀書冬夜長宵沉沉凝寒凜如撫此窮陰悵然
不寐是用有作辭曰顥頊司御兮移玄貞黑帝渙號兮
趣朱明悲泉沉暉兮野靄冥駟宿耿耿兮流長空素蟾

碾碧兮寒光清青娥肅征兮鴛瓦冰蒼昊迴而星垂枯
梢號而聲悲大河伏濤兮凝璐連輝溫泉封凍兮瑤華
瑩璀璨萬動闢寂兮清廟進假其何誼廣莫揚吹兮轅門
號令之戒嚴寒雲冥冥兮鴻鴈哀而流連黃竹蕭蕭兮
玄鶴警而鳴旋松杉墮兮欄檻冷而淒然曉梅粲兮掩
寒紗而晚娟悵銅龍之煞絕兮銀籌淹息霜堞之笳奏
兮魚折杳以聲殘軒楣沉寂兮朱箔翩重扉幽扃兮疏
房寒獸火無光兮嘘之不燃蘭燈冷青兮素膏凝盤抱

雲和兮繩絕攬冰紈兮綿折龍涎熄兮芬滅鳳團委兮
烟歇紅絲氷兮玄結猩穎強兮摧缺悲暮節之隆嚴嗟
衆處之曠別乃有貴奢兮構羅綺於雲霄暄蒸融融兮
護絕域之重貂沉檀耀庭兮鬱攸而香飄龍燭熒煌兮
星分而紅搖翠雉明兮襲錦袍據熊虎兮崇且高烹胎
豚膾兮肥甘充庖醇醪荔美兮紫霞春饒素霓迴旋兮
舞纖腰貝齒聲琅兮遏雲遙瓊嶽穎兮紫綃金鈿落兮
娥媚鴛被浮蘭兮恍巫陽之魂交金鉢暖薰兮惕永漏

之易消淫約懸絕兮竟罔知此寒宵悲風發兮情自如
而陶陶若彼塞戎之宵征兮慘邊聲而泗流關山迴絕
兮望故土於中州負濃霜之重鎧兮寒徹骨而驅道衝
朔漠之驚沙兮月黯淡而雲愁孤臣萬里兮海天沉沉
鳳城云遠兮銀漢無垠時易逝而歲晚兮憂忡如焚愴
遐荒之逆斥兮耿長夜而慮深愁思婦於雲屏兮心已
摧永珊瑚之絳漬兮腸終夕而九迴幽思沉以繚紆兮
遊蛛絲於天隈合歡餘寒以輾轉兮金壺如海而鍾哀

遊子未返兮天涯淪落羈館岑寥兮悵戍烟之殘角孤
燈落而愁絕兮蝶悠揚而遠脫載夙興以行邁兮抱離
懷之忉怛驅渺茫兮寂雞聲之咿嚦陟崇巔兮俯荒原
而曠闊霜風凜其被面兮嗟敝裘之涼薄冰溪皓膠以
迷途兮情惻楚其如割乳獨無眠兮哀生寒廬爐無宿
燼兮惡裳無紩一飽無時兮凜切飢灌妻孥坐對兮相
泣以吁冀今夕之昧旦兮傷來夕之何殊胡為終此歲
寒兮仰蒼穹其疇蘇皇天運化兮無私於好惡四時平

分兮豈以斯人而輟其凝沴推有生之厚薄兮允玄機
之攸賦感遂順之相遭兮憂樂安於所寓貴不可以擬
賤兮貧與富之有數神祇無以辭其憾兮博濟為聖賢
所懼但造命惟人兮我心皇皇仰燮理之任重兮惕此
寒涼闢寢門而假寐兮趨火城之煌煌立雙闕之殘月
兮霏裳履之滿霜啓九重以匡不逮兮吐瑤墀之雞香
格君於仁聖兮沛天德以懷萬邦裘帽釋兮三軍挾纊
而相忘雪宮同樂兮胥肉帛而有常夫無外曠兮內無

怨女之彷徨彼四方之人兮孰不期溫飽而我望苦凍
餒之無聞兮靄和氣而洋洋寒暑有代謝兮春暉煦而
悠長固君相之能事兮又安危關運化之否昌坐喟嘆
而漫漫兮其誰待旦汲汲於廟廊顧茲寒微兮何以弘
被抱此區區兮暢回春之溥及淑氣敷以遐征兮罄寰
宇而俱立借物我而悠然兮慰是夜之悒悒

帳詞

為儒學師生送童貞菴太守入觀帳詞并引

伏以圖靈啓秘冥陶瑞世之賢方夏崇勲昭仰御天之
睿故荒陬無久否會際貞良而善治有奇馨協欽隆渥
恭惟某官炎鄉鴻筆羅諸仙才逸韻松飈冲懷桐月抱
千古江山之秀擅一時文藻之宗錦捷秋風回首龍超
萬蟻桂探寒窟揚眉虹貫九霄青錢遴慎於玉堂鸚翫
易水赤邑寄專於墨綬驥展湘雲三禊政成江城花暖
一遷福賚海國星高楚去而見思夢澤草長迷望齊來
而嗟暮蓬瀛雨足騰歡德化洽於渤海豚魚畢信恩光

流於原野草木均輝王風返而恬熙醉慊村烟桑柘文
澤深而汪濊光生璧水桃花吾道孤旌金章企慕斯文
正印玉筭聯翩幸傾圮之經營遠鑒麥葵搖蕩荷清寒
之矜恤曾聞首宿闌千秋鳳獨翔已慰吹噓天上春龍
旅應還期輔翼江濱五馬騁而恪詣宸楓三鱸違而蟬
媛岐柳簾霏雞舌御屏題漢循良珮轉螭頭帝室延周
篤棐沐無涯之天寵喜溢滄溟睽不世之邦侯情含翠
岱晚山殘雪寒侵綠蟻芳樽古道酸風吹斷驪駒清詠

冠裳郁郁絃管嘈嘈長憶天東短歌水右

詞曰

山館翠雲寒曉色新霽古木含風捲濤細川長烟渺情
思啼鴻聲裏文翁金闕去留無計孤鶴霜明七絃錦
秘五袴清歌溢流徵玻璃紅凸相送紫霄凌厲鳳池調
舜鼎匡明世

右調感皇恩

為膠庠師生贈高時齋節推署州代還帳詞

伏以竒器奮乎風雲留思徵淑庶情昭於日月協美揚
焮道直天機淳元未泯聲芳人紀悠邈奚涯恭惟某官
高風周甸雅望秦川華峙英靈渭波精秀瑞岐陽之鳳
鳥產自名家窮太后之龍圖紹由先世橋昂碧落未當
世而擬後達人桂占青雲訝鳴時而輝前繼美蚤圖九
萬簌擊南溟晚慰黔黎銓榮上國明弼宸極緬尋鳥喙
之芳使伴寒星遙徒爽鳩之域慶鳥巢於春樹沉鬼哭
於夜臺刑訖於揩刑清息庭前鼓吹訟服於無訟赤違

水面波濤忽吏換膠西黃章生綠幸旌移旅北腐草回
春寒谷恩光良慊自天之隕窮簷膏澤式占時雨之私
栩春夢於華胥鶯花暢化悲晚來於青壤溝壑騰歡消
鼠狗之妖蹤朗月清澄墟落屏豺狼之奸跡震霆烈赫
山川赤子如傷豈云青眼丹心似水莫探玄淵洞寸照
於水晶青焰炯玉荷之影涵萬機於藻鑒明湖流桂魄
之光貞操垂晚節霜筠義概凜平生冰蘖宦海波而砥
柱恥繫商帆世道溷而日新諱言阿堵風流儒雅攸欽

璧水詞宗夷易溫恭悚企窮陬道乾青衿挹采宛在春
風白面承休坐醺醇醴雨露忘情於桃李雲霄垂意於
蓬茅有代及瓜旌旆遙遙天上含情折柳稱觴悚悚溪
邊復歲月之幾何五雲高翥慨烟花之縹渺萬井疇依
草凝望以連青不盡蠶雲離恨桃無言而含紫聊將落
日歌喉回首巖霏縈擣別緒斷魂鶯語屬和遺音

詞曰

郵亭沉月正杜宇送春時節淡靄連山柔風捲陌滿目

楊花飛雪人渡溪橋晴綠旆裏碧山遼絕無可奈借野
花啼鳥留觴英烈傷別難忘處三月彌旌惠政人人
悅絃誦春長桑麻雨足方信海波恬滅何意孤城甫慰
尋遠三秦豪傑便指日向烏臺青瑣傳霖望切

右調喜遷鶯

為鄉耆賀戈雨溪榮膺嘉獎帳詞并引

伏以靈鳳徵祥義馭光華岱應龍神化豐隆鑿韻山
川故英雄奮明聖之期幸世道際亨嘉之運恭惟某官

燕冀休靈古今俊彥深沉令德慷慨高風逸韻稟自天
陶冲氣含於特秀襟懷璞玉唾噉明珠蚤捷蜚聲載耀
龍光於雲漢重輝接武旁昭瑞彩於虹霓鐘鼎之業合
羨夫家傳儒雅之風爭誇乎世繼忽宣綸於北極式贈
馬於東州旌旆揚休枯槁樂陽和之候閭閻動色顛連
仰怙恃之秋邇清光而巖電奪晴探幽格而松風遺響
抗鴻鵠之志擬迹循良潔冰雪之操乃心民社清才實
學君子攸欽純化義風匹夫胥慶禁奸不遺於毫髮馭

黠果震夫豺狸仁恩與造化爭流靈威共雷霆齊軌邇
遐春盜政教雲行海國日長乍識華胥懿景村局夕靜
頓回太古醇風溫溫乎豐歲瑛清時可愛粲粲然荒年
穀赤子所天廉班胡氏父子以天語流光勲繼董生南
北之鄉評有在偉績茂昭於海域芳聲丕著於霜臺春
日生輝驟蒙嘉獎秋風播譽竟復重褒甫期年而治効
垂成未半載而恩榮荐至某等揖英賢之令範已踰白
頭接錫命之寵光倏經青眼不勝歡躍競笳鼓以相迎

奚啻聲音聊謳歌以敬壽心慚斧曝調謝宮商

詞曰

霜樹蜚紅烟峯凝翠雲齊秋晚搖落羣芳操持暮節方見籬英艷西風遙逐陽鴻征曉報到天恩重衍慶仁聲薄海窮山共欣夙懷今展琰譽播青珣名馳充空自芳傳殘簡垂老躬逢清朝良吏無負虞湯選綵鸞枳棘飛黃庭際應是不堪狹淺行看取秉鈞異寵沛霖溥演

右調永遇樂

為千戶所賀楊子承千兵完戎朝獎帳詞并引

竊以明聖神機旌淑恒先於厲世豪雄効節臨戎豈憚
於捐身恭惟某官將軍胄子閥室俊人魁梧殊標端凝
令範耿青年之義概正氣自天矢赤日之貞操壯心畫
地八陣窮勞夢寐六韜紹邃宮庭申渙號之嚴兒戲豈
沿陋迹本知權之善父書不滯陳言表海嶽之瑞靈慶
風雲之猛士掄精夏府開基之華典重輝鎮肅遐陬褫
魄之威聲四達建牙吹角寂不聞謚拔劒登壇強無與

敵茂瀛塲之春草曾教戎馬長嘶澄淮海之滄波坐致
鯨鯢永滅錦袍飜細柳康堵編氓鏐帶緩生花傾心儒
雅佐政播霜臺之譽攝屯貽寒士之恩兩簡提兵躍然
千里十年就煉惕爾萬全際國家悠久之隆飾部伍凋
殘之弊推心置腹勞思自過叱含協苦分甘布惠頻空
儲蓄貔貅爭奮思兼報帥以報君葵藿紓忱誠非愛身
以愛國指龍沙而禦侮迴煥狼烽旋鳳闕以趨勞靈成
雀賀旌麾攸向績用倏登歲月雖淹人咸恐後閔師而

稱耗方殷當國憂虞離次者無聞獨美元戎紀律累黃
金之腆賚莫稱丹衷慰紫極之溫綸式驚青眼玄朔遙
而飛檄青海渺以騰歡瓊醞充罍銀漢潤分恩渥天機
遺錦綵雲蔚映仙葩沸金鼓之喧闐暢融梅雪萃人文
之炳朗喜合春陽未忝葭莩曠見乘龍異寵祗承豪彥
慚無躍虎英詞一闋清歌千鐘醻飲聊傾肝膈不解官

商

詞曰

翠巖碧海春初麗忽下綵鸞烟際玉闕布天恩鳳閣褒忠義生色煥山城芳譽飛迢遞總只為赤心丹陛况早遇英主明世家散萬金身餘一劍喜有戮力三軍銳寵擬玉關封看取金章繫

表

右調憶帝京

擬上元觀燈賜宴輔臣謝表

某年某月某日臣等蒙賜觀燈與宴稱謝者桂魄騰光

薄海仰初春之象華燈煥彩九天瞻聯璧之輝既醉太平何勝感荷臣等歡忭歡忭頓首頓首竊以天地交泰一元轉造化之機君相協和萬古慶明良之遇故貳室謙光乎唐帝而金臺賢譽乎燕昭火戲驪山奚取深閨之笑酒通淇水終貽烈焰之災南國臨春永嗟沉湎西風汾水徒自悲歌迺者候運青宮大地浹陽和之氣既而影盈玉闕鈞天昭皎潔之晶祈太乙於初元一燈破暗演炎劉之故事幾夜搖紅烟雲斂而明月逐人簫鼓

沸而暗塵隨馬宮城焜耀間巷謳歌六鰲駕海上之山
樂偕百姓雙鳳扶雲中之輦清暇萬機炬爛仙臺何幸
微臣縱目風傳天樂渥蒙御宴稱觴允賢聖之高情實
康平之樂事寒酸至願今古難逢茲遇皇帝陛下德擬
乾元明侔離照恩澤及物炳朗燭奸暢仁風而遐邇皆
春被光華而隱顯畢達三冬陋巷蚤蒙分暖杏林十載
短檠頓致揚輝奎閣春臺謝調元之善玉燭負屯膏之
愆甫奮幽微欲竭平生糟粕晉觀燈火輒施不世几筵

珮轉形庭眼開蓬島香飄桂宇夢入華胥誰家對月能
閒而叨與鳳城之寵何處聞燈不看而曠瞻龍燭之奇
紫府星輝黎影駭飈仙界絳臺風靜蓮光幻逸神工月
闕奪晴琉璃炳瑩瑤池高會龍虎優游煥醞釀於霞觴
明及肝肺照珍奇於玉案暖入腹心簪笏燦銀缸冠纓
豈遺纖手綺羅飛寶鏡瑛盤追笑含桃分黃柑於九霄
罄白獸於一夕相遭道合期於不醉無歸從事軍嚴志
在有懷必吐九重春色共翬仙桃永夜漏聲晚催銀箭

飽飫皇仁而益足沉酣聖化以何知兢兢周誥之中洩
洩堯天之下融查淳於親炙奚啻秋陽蕩邪穢於相酬
豈云江漢東風吹酒旋看銀海初醒涼月伴人清到玉
堂不寐身歸天上而常自光明夢想樽前而乃心麏蘖
臣等昏昧不足以圖報稱潦倒曾可以効勤勞徒抱區
區有懷耿耿伏願有象太平借此春而永泰無疆福壽
並斯月而恒盈演膏澤於幽陰煥文章於昭灼養賢以
圖天下用繼權輿渙居以賚國中不獨盤樂則聖治清

明而夜戶不閉民心和暢而鳬鷺可歌矣臣等無任瞻天仰聖激切屏營之至謹奉表稱謝以聞

擬夏日賜扇羣臣謝表

某年某月某日蒙賜臣等以扇者湘筠破玉黃封隕自九天蜀繭浮香墨跡題當五月草茅增氣問巷生光異命猥頒貢恩仰荷臣等惶恐惶恐頓首頓首竊以八風吹噓匪鼓舞無以育羣品一元索籥非涼冷罔以濟至仁故廓寰宇之妖氛回飈動地而除酷炎之溽暑清商

滿林此吾人仰披拂而豁如因大造以呼吸而咸若也
乃者日貞曜於鶴首律遷度於林鍾祝融鞭赤雲之龍
羲和典陽烏之馭溫風翕以辰至星火燦以昏中處涼
臺而有鬱蒸之煩浴寒水而嗟爍爛之慘聖王體好生
之德歌薰五絃哲人妙制器之宜來風一扇以形軋氣
默契玄機用上禮賢風高前古蓋始為者固有莫既之
惠況分布者尤為不世之恩銅柱逼人慨殘酷於萬古
雄風適已恨誇誕於一時夜色撲畫屏之螢宮闈裏用

秋光致素紈之詠箇笥深藏歌徹桃花醉裏不知炎灼
舞殘白羽閒中獨翫飄揚緇塵染素於九衢清風安在
東帶發狂於庶府明月何歸曾無蘇下以輕颺豈有假
人以便箋王風因之而掃地煙焰於是為薰天何幸微
臣驟蒙珍賜百工至願千載奇逢茲蓋伏遇皇帝陛下
古直德健質素性成妙開闔之天機四方風動神屈伸
之物感百世揚休鑒前王搖亂之鄙心蕩淑世刻薄之
陋習出仙工於天上輔造化於陰初織女機絲霄漢乍

流夜月石鯨鱗甲池塘蚤已秋風移寒色於瀟湘散清光於巴蜀絕塵凡之奇巧如璧如輪祛窮巷之煩冤非冰非雪捧持在手感荷生心發跡寒微沾恩稠疊開緘日下黃金輝映蓬瀛回首雲中仙桂香遺青紫輕涼拂羅袂何須風蹬雲端溽暑散窮簷不向茅堂江麓酷吏去矣身寓青蘋故人來斯神遊空谷障朱明之燥烈蔭庇實多驅青蠅於暄炎肅清益至置懷袖而鄭重入依孔雀徐開慎把握以無忘出為貔貅指示舉動而毛髮

灑浙揮揚而股肱戰兢臣等熟中未已恒思汗出沾衣
寒心方殷竊恐情乖中道伏願嚴操縱之威權輕勿授
人以柄善弛張之治道重惟持己以清作法於涼而罔
貪守約施博而不亂推心及冷地痛懲炙手之徒示法
向薄夫用戒趨炎之輩荷蒙遮蔽無為庾塵所汙不異
寒溫莫致班詩共歎則仁風擬大塊而同德餘光昭汗
簡以不磨四海播揚萬年快慰矣臣等無任瞻天仰聖
激切屏營之至謹奉表稱謝以聞

擬宋論翊戴功加石守信等官爵謝表

建隆元年

某年某月某日伏蒙聖恩加賜臣等官爵者臣守信等惶惶惶惶頓首頓首竊惟亂極思治實皇天泰復之機厯數歸仁正英主豐亨之運故神謨廟算克當乎天心而治定功成不由乎人力武功誠武丁之獨斷翊戴何論文德允文王之寡儔加封實忝曾不以能而自負普施天地之恩何敢以功而是居仰荷生成之德稽晉文於返國功高有不賞之嗟考漢祖於承家事集致當誅

之禍狗兔數語竒功萬古以酸心龍蛇一章偉績千年
而墮淚是皆刻薄之主頓忘勲舊之人臣等退思有愧
犬馬何勞進補無能蟻蛩未報仰自天之隕實切愚衷
慰好爵之懷真逾望外茲遇皇帝陛下乾坤至德日月
休明馭衆以恩雨露溥施春澤臨下有赫雷霆不振秋
毫德威不爽於賞刑處制允超乎今古念八姓之僭竊
君弱臣強傷五代之昏庸兵煩民敝黃袍被體雖天命
而衆義無忘赤德開基錄軍功而大封不棄龍旌縹渺

萬國生輝鳳詔光華九天流渥進有差之隆爵再焰寒
灰沾並領之寵光重榮春槁轅門甲胄際風雲而高入
青霄汗馬刀弓出塗泥而近趨丹陛人無不足恥龍泉
擊柱之爭勞無不酬絕虎士分桃之怨各叨一命較才
程力以何思悉竭寸衷瀝膽披肝而圖報若都揮若點
檢山河帶礪無疆或虞候或右廂日月貞明不替雲臺
異眷越百世而同符烟閣竒猿曠千年而合轍侍龍顏
之密邇共將綵悃一朝仗虎符之靈威誰復橫行四國

慶明時於無事不聞劍戟扶危樂長夜於未央合聽笙
歌聒醉託勲名之暴著詎致沉淪際君臣之交通永無
猜忌臣等終延樂土大造無可言之仁蚤沐恩波滄海
乏可述之潤起死人而肉白骨結莽無因忘何日而藏
中心銜金未即伏願五位昌隆太平有象一德貞固終
始不移保誓命於萬全君臣一體綿本支於百世上下
同休舅犯無棄席之憂恩信日固叔敖息負薪之慮德
惠彌深阿衡榮而商道致遠營丘永而周漢流長萬古

無虞九泉不朽臣等無任瞻天望聖激切感戴之至謹
奉表稱謝以聞

海壑吟稿卷七

欽定四庫全書

海壑吟稿卷八

明 趙完璧 撰

序

海若効靈序

春臺君三年守膠政徹滄涯民協青壤和氣蒸蒸溢於遐邇嶽峯者繁息潤澤者涵育桑麻鬱而風雲暢穀菜熟而康乂徵黃虞之治而華胥之風也父老子弟伏臘

熙熙舉觴相慶且復精籲蒼漠其以斯民之生也治亂
關於弘運休戚繫於相遭殘虐者流赤增波貪饕者地
利惟盡我民何幸際我侯登我治耶往者天保之祝無
亦感休慶而艾君以心也千古純誠殊無乖異此為三
代直道而行者也是以不能無祝願於侯也南山之貞
擬君之躬永君之躬不盡所願也松栢之茂擬君之操
承君之操不盡所願也至情篤意殆超乎天保之外迓
錫仰禧將望於君身之餘也如蘭之錫如麟之託昌厥

後裕厥昆充厥公閭焉已矣天惟民聽而克享之篤生
英秀實惟戊午之始秋君子卜其知本寧昊靈其効於
溟水允矣且東溟濶匯百川長為委輸瀦秀二儀渟清
元綱嘉珍異寶獻瑞呈祥萬品類育千古可考也故夫
木難明月尤補奇絕蓋涵於天一受於朏魄蚌之不知
其獲於天珠之不知其成於蚌也造化之鍾於海者無
窮而珠之產於蚌者曾無老少之異蚌之珠非海之靈
耶君之子不猶蚌之珠耶於穆以無心福仁者而至仁

亦不知所以承天休其時其地所適所遭皆莫可臆究
今君侯年幾強仕宜蚤育江鄉而佳氣顧騰於海域宜
多男於窮居而弧矢甫繫於朱旛其澤及生民而後天
德之乎其涵濡滄津覽濤波之吐吞沫蛟龍之烟雨漸
其秀而化於靈亦得以蓄結玄妙是皆未可知也但民
情所寓人言所及依理符迹吾不得而遺論也烏可不
謂之海靈耶况英物韓韓啼聲琅琅猶鴻鵠雖未羽而
拂霄之勢可逆覩矣幻逸天池清瑩蟾彩異時光朝廷

輝四海聲夷貊重古今茲公之慶也民之望也海之靈
所以協於天也

代贈劉氏樂壽堂序

劉氏子者風神逸爽偉然三齊俊人襲先聲累業雄於
珠右拓故第而新之大構霄崕川原動色且廣締四方
豪彥一時儒紳率雅愛之甲子冬予將北探江春戒行
在即忽有欲為留行者倥偬冰雪間切諭劉子景懷今
願竊導騰虬披珠雲移旌而南光乃鼎室遺乃珠璣以

垂慶於無極惴惴然將不慰草茅覬私耶予解脫唯唯
用扁樂壽以贈主人揖而前敬觴為壽或曰智者樂仁
者壽智仁之道亦大矣哲如顏樊猶待問焉劉氏其智
仁矣乎奚扁為予曰不然人心之天不終澌泯塗珠璞
玉礪澣彌光匪情而揚誣也機萌而沮棄也皆非也軻
命世英儒曾不知戰國風習顧以仁義爭論於時可謂
智乎無亦以彼昏不愛仁義而利之出乎仁義者將不
愛耶故梁惠好臺沼而進之聖齊宣好雪宮而推諸王

齊梁不關民隱然齊聖興王諒足悚動方寸劉君為斯
堂將自娛而永焉者吾不以樂壽開之堂胡為哉况望
其知仁乎吾今冀其樂而壽焉融融斯洩洩斯伏臘斯
子孫斯劉君其自得矣雖不告以仁知將不繹其所以
而求諸浚源植本要有餘師因樂以崇知由壽以敦仁
樂樂而達於君底豫而達於親墳箋而達於兄弟琴瑟
而達於妻子笙簧而達於賓友周流活潑莫非樂地罔
惑於聲色罔誘於貨賄罔奪於威力安固永貞無戕所

天樂示而智進壽啓而仁弘緣此獲彼魚網鴻罹誰則
知之劉君將不為明理以終樂貞守以介壽者乎況東
望滄溟西顧長河鯨波潮而虬帶環陽俟河伯君之適
也大勞在瞻二珠伊邇青蒼鵠而鴻龐基林林央央君
之契也此又非樂壽出於堂之外而智仁之雅懷幽致
會得於天者乎使君而淫於樂於智則昏焉已無述於
壽於仁則悖焉已昏且悖其奚處於斯堂或曰博矣哉
君子之言非淺夫所窺也僉勉劉君其慎審於樂壽

勞山仙跡序

勞為墨陽靈峙枕滄溟而峻迥東南秀於青聲於天下
逸物外者咸茲樂慕逢冠挂而斯東安期老焉骨有取
也世傳丘劉王馬輩舉此仙焉信耶渺茫之故適非青
眼妄耶史籍攸徵殆難極詆嵇生之論存乎養久而仙
或由茲也長春諸翁見超寰宇越嶽峯履奇峭奚啻千
億祗惟勞焉依依無謂耶海嶽之吐吞雲物之舒卷冥
化之往來必有奇趣入乎其心而契焉而陶焉者虛牝

抱元精鍊致極而還虛破造要所必至蓋亦自不知其
喬松之趨也混古今於天地弄風月於川岑神遊意適
周非豫所寸靈之秘洩於英詞悟塵之幾託於幽石霞
栖雪殮紫封碧蔭鳥窺而樵遊焉耳詠我思者誰歟嘉
靖甲子載值君陽湯公尹墨宓絃之暇慰適宦况勞無
餘區尋幽興懷撫跡增慨虛玄茫昧者空復夢思而垂
悠寄遠者宛在貞堅猶可彷誦剗翳掃烟靡隱弗底獲
詩詞古體五十餘篇玄珠之慶良慊夙私竊惟海內之

嶙峋層見奇跡恒渺乃有高林石之興而欲一騁歷覽
之懷率皆滯於時牽於勢塵拘艱解悼種種予毛卒未
之酬者指可勝屈耶雖予亦密邇海涯纔百里耳覩崎
峭於目前聆勝絕於夙昔寸心如飛猶越萬里攀躋之
志恒切而仍歲無諧况其遠者乎君陽公以其跡諸勞
者移諸梓邈歷迨茲曠逢懿舉俾無距珠玉儻徧中原
勝徵而情慰無勞而可勞間有微辭奧旨妙悟神會者
得無樂際矣乎君陽之於道玄關幽鍵仰不可窺即仙

跡攸崇無乃慕之篤養之深臭味之相入賞音於善歌者歟于野之利何其博哉矧蒞墨以來軒黃之化而旌陽之政跡之寓乎墨者皆以銘諸心不但寓乎勞者存諸石焉耳噫演勞跡者君陽也昭墨跡者玉堂在今銀筆在後不知其當為誰也塵埃鄙人雕龍匪技詎敢為諸仙序聊復對君陽之命述其畧兼章君陽之美意云

贈儲少梅將軍掄典戎政序

膠為遼右窮壤南北界萊靈二戍間徹三百餘里滄溟

浩望曠然潮汐之區倭夷伺逞靡常撫圖籌釁者乃不
顧茲陬凜森耶沿渙連兵以膠衝雄鎮崇墉以昭巖駐
戎以張威選將厲才倡勇明政用宣聖武遐荒也始敦
任七侯率由殊簡二百年中繼美揚聲海上者今莫仰
矣儲氏少梅將軍將門英胄涵淹儒術毅然剛介中有
雍容文雅之懿藝精力強才優識朗古名將風烈銜命
以來文武屬心殆以安危輕重繫將軍也嘉靖辛酉春
侍史檄執戎政遴選慎名實核協人望哉少梅將軍震

惶罔自勝感一飯於思酬慚世祿於未補顧不幡然悟奮然興惕然求免厥艱耶中外熙熙印首維新令而風霆威而霜雪介而金石操而冰檗樽俎可以折衝帷幄可以禦侮虎豹雄踞長城逶迤鯨鯢之波其幾息矣乎蛇豕之毒其或靖矣乎絃誦興耕耘無事太平之樂乃不賴將軍以有終矣乎冠裳相慶且從而祝之難副惟聲難克惟終細或不矜其罔有不傾將於上下負匪淺也尚自厲焉拊髀惟時築拜有期垂黃秉鉞萬里之封

豈直區區一隅之顯已哉謹日夕以仰

代姜省吾侍御送劉春臺太守考績序

歲辛酉搖光樹虛危寒颼凜如玉塵炯炯春臺侯敝車
羸馬遄征之色溢於道亭庶黎超駭莫慰攀延熙洽中
不知崇年効績檄速稽核將以旌淑德昭陟典也猝奪
吾良奈若何省吾子榮其行君子也幾何人哉聖皇三
五紹麻渴篤世英四紀相尋以躋嘉靖之治無他考核
鼓舞爾也侯六載溟陬一貞永矢雖有橫陳漠然也楊

稱四知弗來胡畏劉纜一選弗贈胡辭侯曾未聞來且
贈也殆淵方寸波瀾寂絕要難以漫窺焉者無蕩天
機庶理懇至公斯也明斯也威而斷斯也本植而績庶
凝焉孤魄停瀛清飈逸岱夫或得而禦且撿諸茲不稽
焉攸勸今天下籍名寵以騁盡錙銖而利實有蓬心蠹
乃紀經胡能侯擬繼侯而後皆侯耶匪侯耶種種予懷
無或諼焉若帝臣罔蔽萬里有明寵眷茂殊寄任出入
以德諸郡者德諸天下此又人心無既之觀也省吾子

欸欸南山之廬松楸外不狎塵機侯行念茲揆有言任
媿無言徵制於時泥於迹即不能以俟圖報尚宣言臺
垣庸罄忠赤行將采焉以聞慰夙私也姑以虛江公甫
來竒侯之器不遑悉侯之澤樂聞而誦之趣張水石蟬
媛增楚金石震而玉觴酬於游颺而五雲茫驪駒不忍
聞孰予言以贈

海屋添籌序壽年家楊叅峯太翁

添籌事邈不可知然造化之運甲子循環其或司冥紀

者理亦有之近恒摹繪奇跡以相贈遺無亦援仙靈以
擬長年非斯人之至情已乎此其圖者何壽洛之楊崑
翁也其壽楊崑翁者何敦年家懿也吾郎慎修膠致乙
丑春第適與賢嗣同之叅峯君為崑岡片玉洛才俊逸
也視海山牧豎奚啻倍蓰實竊蠅附及分令鹽瀆而又
同窯淮陰洽情楚水且幾三禊郎嘗拜崑翁淮郎而衰
質亦曾幸挹叅峯通家之契良亦深矣戊辰春旅觀燕
都王事竟叅峯君休然記翁當七袞稀古春秋喜溢顏

色將汲汲便經故洛以觴初度郎聞而嘉之欲偕往不
果遙致已心許焉歸而語諸庭余曰諾佳哉是不可無
慶慶以神祉吾海人室廬潮汐間仙跡茫茫習聞已久
雖不躬覲其異古史籍亮不厚誣添壽海屋茲用圖焉
今復指三山之曉鵠睇十洲於微茫銀臺金闕所寓紫
鸞黃鶴所歸海之屋殆可究可言籌之添亦何終何始
水淺蓬萊塵揚澥渤籠鳥之辰云誰數計而太虛浩劫
要難紀極歲易籌偕人依化運崑山翁其將優游穹壤

而不自知其壽擬玄昊也雪刺方瞳烏紗玉杖餐霞咀
芝雲卧天游悠然伊洛中奚俟玄圃瑤池耶况桂林鬱
鬱蘭茁森森而賢嗣參峯飛鳬之履甫過金門旌揚之
聲上達天闕行復大擢玉堂調鼎鼐以壽皇圖則黃虞
斯世真不負所以義涵也龍章鳳采紫誥重褒自天之
澤如海斯深此又添籌外無涯之福籌亦所不能盡算
焉者矣小子乞予言以信友篤敬也參峯事君不忘其
親崇孝也崑山翁茂無疆之壽徵仁也敬則善交孝則

不匱仁則與天地萬物為一體宏裕而可親焉者也余
於翁神交久矣况今蠹延亦已六十有九晚齡同躋喜
聞而樂誦之欲同慶華堂仙雲縹渺莫慰逖忱忝同盟
之好假仙籌以獻同天之祝云

代慎修送溫玉齋三尹榮擢魯藩司寶序

余素耽清曠家世海山狎於心目出必登臨舒寫入則
園林沼榭會心自娛同志者蓋寡焉乙丑夏謬領鹽寄
違猿鶴而南勉蒞踰僻日夕塵勞頹乎俗吏回首雲阿

夢寐渺然乃有少尹溫玉翁者風流醞藉曠古高人雍容官署中峻結幽軒小築亭臺佳木葱鬱琴鶴蕭然偷閒機務而山林餘事隨其所適蓋超然不累於喧囂之煩而洒然特逸於簪紱之外也余然後知其為仕而隱焉者況乃堅持凜凜不為苟污豈特居處之清而高節更自嶄然可謂心迹兼得其養而孤奇塵表寡儕也余每喜其烟霞幽趣宛在咫尺簿書之暇假之游衍資之諮詢相與上下數千載間古之是非得失以及今之賢

不肖可否飛屑颯颯如燭斯照蔡斯卜也吁有是哉翁
之可嘉樂也其裨於拙薄良不淺矣究極師友淵源翁
汝人毓汝秀而邇南陽山川之靈其亦有得伏龍鳳雛
之遺風者不然胡高雅乃爾竊慶方殷忽有東藩之擢
聖天子篤金玉之親重鳳鸞之輔去鹽就魯親親賢賢
之義兼得之矣但江海之留思未艾鴻鴈之興懷無已
也翁行矣魯周公舊國宣尼所生禮樂遺風千古不終
澌泯翁覽龜蒙洙泗之勝撫浴沂風詠之迹回琴點瑟

人遠而真樂猶有可尋翁臭味惟同慨慕依俙磨之歲
月當必有進於平生者翁慎厥司欽厥寶增輝滄岱以
迓天休此其常業耳恪職之外更以寶之胸中者為國
華焉則輝光日新清越以長綱常植彝倫昭主德敦教
化隆亦幾乎變而至道矣魯將不遺其所常寶者而寶
翁耶况懿德之好有生恒性竊恐魯不私其實而揚于
帝庭以為天下共寶之是又所日望而惓惓者翁其無
自高以棄天下

贈景節推重均膠役序

斯民慕三代之風而千古無忘者何哉孟子曰三代之得天下以仁仁也者亦惟得其民心焉耳夫民情不一物理自然夫孰得而遂之乎是以傳大學者謂君子有絜矩之道亦莫非王道支流三代遺意也然明王圖治惟艱曾不以得人為要務乎哉肆我今上法祖弘恩求賢如渴親民宣化尤莫急於守令龔黃卓魯期其人三代之治覲其盛也且令非也而守正之守失也而府抑

之此又設官之美意而行仁之令典也吾膠僻在海涯
尤為弊郡土瘠民貧役繁賦重號稱難治久矣雖有循
良之政猶不能速効於更生况舞文弄法者之相仍而
姦偽萌生耶民焉攸賴國家例以三載一均民役隆慶
庚午冬適當其期亨菴守以觀事匆匆未暇竟妥東方
嗷嗷哀鴻之聲溢於海隅撫臺憂之思得風裁夙著者
一為撫綏而我公當時已蚤為默卜矣公適以賀歲聞
命戴星而東祗惟負託是懼入膠來愴弊悲窮補偏剔

蠹恤瘡痍如已子慰寒酸猶故知好所好惡所惡一徇
民便而罔參已私真猶父母之愛其子也無矜容無厲
色春風和氣中人未嘗不畏刑威痛懲下人未嘗不服
斟酌得調停之善而會計無錙銖之差上不滯惠澤於
當道下不致隅泣於窮簷一時膏雨宛蘇海壩白首絕
荒自謂終於頽風已也何意驟覩善人之治曠瞻三代
之澤不猶醉而醒瘠而鳴仆而起耶公青年甲第賈然
燕雲雋才小試魯郡天假惠臨初挹其輝采侍其珠唾

已識其逸絕風塵矣况復躬蒙德教而舉措閑雅規度
弘裕遂占所就更當何如噫宰肉細事也且以徵相今
此休休之心優優之政章章人之心目時復金甌之卜
舍公其誰士類歡慕之餘挽之固不可留望之又不忍
去聊託衰殘以相贈誦然東野之鄙言諒不足為鴻筆
齒草次揄揚一以為君子美一以為俗吏風焉

張平山畫冊序

張平山者大梁祥符張路也字天馳初號茅蹊子先大

夫正德辛未間判開封予因識之時張游府庠計其年可三十前也體質短小器識溫雅胸次灑有奇趣不多飲酒賦詩鳴琴志役物外而其筆造之妙初無所受於人天畀之巧雖心手亦不可得而知一落穎靡不駭訝時譽藉然每留連於豪商大賈妖豔珍奇羈縻百種以是士大夫慰其意者蓋寡矣而窘焉者恒有難色先大夫畧常格曲意招之張感焉及晤談契合遂傾意相將而交好日敦始愛予艸總知琴曾作高興圖為忘年贈

其相與之情伯仲中於予尤篤也燈宵手語時復連牀抵今有惻乘興揮灑甚多曾覩有象簪刻張路字盡妙處即識之倉卒之圖多而不暇且漫然有待遂因循終致不果丙子秋先大夫有武昌之命分袂來迴不相聞後訪其貢之太學珍於公卿名動京師先不知更號何年而天下莫不膾稱張平山也有得片紙尺素之遺者寶藏珍愛琬琰木難無以易之皆不知吾家之所蓄者多且久焉愛雖鍾於平日名復重於末年其進於後來

者竟無一獲是為悵爾雖然但要其得意處雖少年猶老筆嘗聞昔之詩人有年未壯而風格亦已夙成者卓識異才豈論蚤暮張之筆妙殆亦無聲詩也何老少云良亦足珍迨今五十餘年間散之昆季而獨存者無幾張曾謂蓄畫莫如作冊吾因而役志焉茲用永之以方付慎修慎秘以藏值嘉靖乙丑舉進士出宰鹽城余亦當隴西歸暇從容借遊攜取以資翫弄適覩溫栗翁三尹汝人也得平山之履歷甚悉始知壽以云殂也深為

悼悒將追刻平山小印於諸所遺皆為補識庶不混真
以衍厥聲又欲各勉題詠哀思之餘以終朋好之誼且
恐才不逮志詞不能摹先生之精也夫姑曲為敘述以
章諸首云

賀張恂翁七袞序

古今人恒多慕仙其慕仙者何謂長生也曠逸塵表也
神變化於莫測意萌而罔不慰也其孰能破造化外五
行與天地並日月侔哉借有勞心苦形如鑽盤閻壁負

井揖枯精煉致極而至於吹笙跨鶴鳴簫乘鳳駕赤鯉
於清波驅綠輿於碧落以相羊乎兩間者要皆理之所
不可知也蠱惑之深雖帝王亦不能自己荒哉燕昭周
穆秦皇漢武之為心也張翁寓於稠人之中而特異乎
尋常之外產古即墨去鄒魯甚近陶然醉孔孟之風於
數千載之下純乎其中而朴乎其外共德在家謙光在
鄉庭教孜孜篤求善類以為師友之資迺爾賢嗣文伯
秋雲効捷赫然揚海岱之光行復登瀛選膺台寵為時

霖雨舟楫不賢而致是乎若夫役志渺茫以自沉溺於
怪神誕妄皆所弗屑也然德本諸身靜而恒焉不期其
壽自爾永年出入烟霞優游山海閱世故於虛舟撫日
月於籠鳥忽不知其瞳爾紺背爾鮀髮爾種種矣邈乎
壽之不可及已然嘗冠切雲於暇日拽靈壽於清風褒
衣芝馥潤帶蘭馨酣春醺而謳商山蕭然太勞峯下為
帝懸解安期之儔歟偓佺之儔歟崑崙蓬島奚以踰茲
芝顏玉彩快覩斯人其於生翰白日而清虛莫可彷彿

者何如耶桂嗣蘭孫繩繩森立其於名存仙籍而苗裔
莫可究極者何如耶况帝賚之榮莫逆其後天錫之齡
未究其終翁之仙於人間而出乎天仙之上者蓋幾許
矣福祉非常墨云胥慶膠之縉紳能無景德而希光已
乎且託予言以贈顧拙薄弗克誦述祗惟吾郎慎修嘗
內交文伯舊有通家之雅廼勉於揚擢陳辭為諸公代

壽

贈鏡湖王司巡三載考績序

夫觀政者聞其譽不若覲其人覲其人不若核其績績
徵而慰覩焉宜其譽之不泯也鏡湖子淮陽美士楚藩
淑僚擢巡逢猛司銓者拔英揚俊遙託荒陬謂其雄鎮
要害而分寄山海也方其揚旌而來勵精應物雍雍楚
楚溫然連城之輝毅然百煉之彩人咸謂茲貞良之質
也予聞之可哉容未必然既而士相與禮愛之無尤焉
民相與敬畏之無厭焉有司悉從而付托之無惑焉人
咸謂茲才能吏也予聞之可哉譽未必然洋洋藉藉殆

擬芳秋蘭比翼翔鴻矣君子要不得而盡信也某衰謝
巖壑瞽然塵務冠裳車馬邈不相及吾於鏡湖子飢渴
有情云觀未繇空復勞止乙丑春適泥書在庭填門有
慶鏡湖子牽羊負綵以臨挹其光冲如也聆其音秩如
也把袂惄惄好爾忘倦吁嗟人言其不謬哉及察膠南
曠數百里靈鼈之衝而青徐之走集也變亂無常恒為
當道憂乃者防禦有方馘俘屢効東南僻域殆坐靖耳
曾不聞夷窺於溟寇恣於野也且催科有道不妨公不

病民寸衷無累而匹夫不怨得人若此亦難矣哉期當
考績而去人咸思慕之君其勉諸方今用賢無方超陟
不次君之晉未可指數切無懈清操弛壯圖乖古道負
明時以自贍嘉譽而頽偉績也戒行晚秋庶情悒悒追
而送之雲之涯酌我醴竭我忱臨風以贈君胡來東山
孔懷君胡去五雲維翥君之心惟石與金矢彼石金君

子攸欽

送樓念竹太守入觀序

古諸侯朝禮孔子列之九經以啓魯哀孟軻氏本之述職以悟齊宣振王綱以垂後法厥意豈其微哉我聖祖開基撫有華夏酌古准今制為三載一入觀天下有司莫不應期以從事是舉也立法之精又有超乎前代者寓焉考覈由茲也旌別由茲也黜陟由茲也勸懲由茲也玉帛之萃有以光神禹之隆英俊之輯足以協虞庭之美廼不盛歟况今聖主虛己好賢孳孳圖治往年躬宣睿旨以勞遠臣宴賜之榮恩禮之篤懷忠良而有激

者孰不精廼心竭廼力効廼職耶是使天下罔不臣政
罔不舉民罔不順且治也熙洽之世何幸躬逢萬曆丁
丑春又當其期我膠侯念翁將行膠人始仰而樂其進
御宸極又不忍暫睽而忘情於翁也翁胡為乎來哉翁
江山瑞靈簪裳淑裔早登甲第而首試以推鞠西江強
禦不畏摧抑權奸者法無少貸聽斷惟明平反曖昧者
衆罔不服勁節高風悚動上下維時內詔慇懃秋曹暫
署朝禁方慶其弼教得人天下可以無冤民也何間廼

萋菲生焉濟水別駕以行其亦黯而淮陽舒而江都焉
者其誰不為之憤惋耶公忠勤自若漠然無動鞅掌塵
埃中聲聞鵠然當道以膠難其人遴擬我翁而疏遷之
御命東下海人其更生時也五馬蕭蕭朱旛郁郁蓬瀛
生色草木增輝不半載而田埜辟餘糧栖畝也人民治
華胥易境也訟獄均雀鼠相安也盜賊息犬吠不驚也
較藝奎垣朱衣不違於青夜平徭窮壤蒼生溥被於春
陽籬落鶯花山城絃誦豺狼屏跡鴻鴈無哀依俙太古

之風儻以挽也吁嗟乎昔何時也今何時也而何其來之暮耶且今之慕古者以鄰境言之不過曰渤海之龔遂密之卓茂伯起之介潔蓋公之清靜芳名雖茂而實患漸泯語之人人亦罔焉耳廼者循名核實交相副焉青眼康乂間當漢之循良者其誰歟翁之過於古人不其遠乎方今明通萬里簡在無私斯行也甫邇天顏則晉接殊隆超踰非次騰翥當其時而久於膠不克終留也仁人之失可不為深慮乎迂叟沐岐陽之澤藏之廼心

徒將不朽耳適辱諸縉紳以言徵竊媿頽齡昏耄謝穎
楮久矣上無以悉衆善下無以盡羣情聊述鄙懷以備
達諸道左且祝之曰其人如玉挹公之光兮其德如春
值古之良兮天子維明兮式穀之彰兮海人有懷兮亟
矯首於帝鄉兮



海壑吟稿卷八

欽定四庫全書

集部

海寧吟稿卷

九至
十一

詳校官檢討臣劉忻

侍讀臣孫球覆勘

總校官編修臣倉聖脉

校對官學正臣翁樹棠

謄錄監生臣王宮

欽定四庫全書

海壑吟稿卷九

明 趙完璧 撰

高八姐傳

高八姐者膠東鴻臚南泉翁李媛早孤鞠於匡慈匡出憲長公淑源有自嫡閨風節蒸以性成古列史種種默識溫然良璞在韞也及適密也礪山進士之仲子管二元者閭儀雅慰堂室戒二元緝學勵行光休維奕及二

元游虎闈省鄢陵而東值餘疴未殄嚴霽野飈長征遄
勞黧然頹然幾不獲稅駕故密八姐一睇震惶神爽飛
越即趣赴膠幸圖餉碇盧扁察而謝焉八姐審不可為
飛悉宦所阿姑星戴以還二元劇且慰薄請金遺別八
姐不忍泣懷之無何罄珥飾暨二元堂授備以札歸
姑前一號投頓彌日乃蘊諸莫諳故二元尋就舍八姐
掩罔知潛自密經衆亟索釋之二元少蘇聞故求閱嗟
痛久之遂幽約會合越日棄客八姐自二元報革即不

甘食至是憊餒彌甚伺間三死未果五日哭不輟泣盡
音竭待斂而已或以寡姊之生例解焉乃懊憤曰吾方
寸事已定為常識拂擾憐我者媿我深矣天云墜不徒
作未亡人若阿姊撫有襁孤用延綫緒是可無死管無
遺育其誰與圖存苟氏之緩已為下策為身防者吾衷
且叵窺焉遂絕水飲僵卧不起凡六日母姑泣勸直一
沾漱即吐曰起若兒吾可食矣五內蒸灼舌燥以槁齒
漸以脱骨立容毀母憐之曲為調攝覩少延焉八姐賾

謂逆已兒以死慰以生忌也匪石之心徒爾勞益我苦耳再逾日厥息寢微暢然曰今果貞初志媿貳懷也一節有終從容為諸骨肉訣無憾矣乃歿時嘉靖辛酉閏五月之廿一日越二元之殂其浹辰也八姐以廿一登合甫三襍萃涣靡常恩愛幾何管之宦裕可以溫飽高之雄宗科名儒俊可以終賴矧古今奪志之權抑亦不尠八姐冲年弱質迺能精識茂見就死不易青女炎鳥超氣埃而特烈美丈夫弗迨也英皇之死有商均焉死

而過也叔姬存紀無裔緒焉過而生也徇義蔑生邈焉
其罕媲矣夫海壑子棲遑溟曲厭衰頽久矣駭聞而槩
紀之用彰聖化表堅貞勵靡風也異時備良史薄采

張老傳

張老者不知山左何許人亦不悉其名字但東人率以
老張稱之性敦朴鄙嗇鮮以賄交人多與其厚而賤其
吝也適有惡少往訪之堅拒不應索之亟力拉於庭瞬
息格殺而出至門驚惶莫措踟躕而言曰我將焉往觸

其門者再俄亦仆斃少焉張漸蘇以生惡少竟以死矣
侯徽特聲惡少之死絕不允張先見殺惡少因以自殘
也聽者卒以相毆鞠燬抵死雖屢錄未決其誰能輕脫
之噫始以無故之死而人自償我繼以不死之故而我
顧償人寃哉雖然惡少之死其究也貪而忿無足罪者
張之死而生生而死得非蓄祟其身嗚因其累耶

蟻蛸傳

蟻蛸構羅牖側大纔若杯局狹而縷微僅以困蠍蠻蚊

蚋即為巨充曷敢橫異圖哉伏匿羅際用需來者會有
飛蠅卒悞觸之窘鳴間蟻蜎震慰望表速前以承天隕
既而所以為具與力尋集私揆忽復却目伺之罔措中
殆幸以一獲蠅鼓翼奮躍極力楚踏小羅旋空而脫蟻
蜎亦隨蕩越相失海蜃子嘔噏歎曰微質也本不足以
制宏幸覬也竟顧以滅家小而謀大曷可不程情以幸
免者其戒諸

古粧鏡記

先大夫收春翁博洽好古正德間宦遊開封曾購獲一
古粧鏡背銀鶴而寢玄朱翠斑駁銘字宛然余竊愛慕
先大夫因以畀之余敬承良用珠檳未暇考究嘉靖乙
酉之十月曝日短簷漫閱菊坡叢話適有宋景德間軍
人楊起於鳳州遁赤山郭家崖下洞穴中入見有石鏡
臺一座鏡圓五寸背鑄水族回環有三十二字云煉形
神冶瑩質良工當眉寫翠對臉傅紅如珠出匣似月停
空綺窓繡幌俱涵影中方取鏡聞後有風雨聲既出洞

則鏡存而匣爛矣詳是粧鏡不知何代文義甚佳惜不見於文集而獨見於郡志故傳錄之以補欵識之一云註出學齋佔畢也閱既掩而嘆曰有是哉相遇之奇也其所述規跡文字相質無舛但中二聯與鏡文差越前後想亦當時紀錄誤耳及再考博古圖形製有大小之異文字有多寡之殊皆云自漢不可証據大抵世久傳悞誠難得真即今存者是則庶可以徵諸傳非也謂為漢製亦宜噫器物之在天地間如金石類者歷古今遭

常變寓隱顯如絮流風如萍渙水惡知其有定在耶要不可以意圖而力致乃者傳之古汴者越千里而歸於吾室藏之先人者於諸昆而遺之不肖況入洞以前楊起以後歷年幾世傳經幾手雖紀於學齋時亦不識此鏡攸寓纂於菊翁時亦徒慕此鏡芳聲耳今宛在茲物雖微理數存焉不亦良可幸矣乎乙丑秋慎脩兒舉進士出令鹽瀆以便省歸余會倦於家政悉付諸郎而是鏡特授之慎脩以方民社攸歸觀人觀己之間足為明

法厥意滋深豈徒傳紅寫翠已哉其繹之其世守之海

壑翁識

書諸子姪自社引

我列祖諸丘壠皆在南山下去城百里時祀維艱自先大夫欲遷之不果而逝以是先大夫卜葬城南之二里許諸兄弟相繼而亡序昭從之子孫之拜掃者始便於時又趨赴各異萃合無常情雖同而禮不一甚非所以睦下而事上也隆慶辛未冬會慎脩兒以兵曹郎送婦

喪歸懷慎姪相與議其事以質於余適符吾志因可其言遂集諸子姪世恩堂而教之曰奉先惟孝不以禮非孝也孔子曰生事之以禮死葬之以禮祭之以禮吾於爾生事葬祭無容喙矣而祭祀之儀得無諭焉已乎構祠未竟况晦翁家禮已有成式亦將待時舉行姑以墳祀論之昔我尼甫亦不以為非春秋已為壇祭而東漢初遂成俗焉繼今不可不遵古奉先以立吾家之準也月為三會會有常品因人以序齒無越酌家以出資有

差掌握一人每歲時致祀預委一二幼而才者置之於
吾父為尊祖之義特一具雖豐而不為奢於爾等親為
追慕之均雖殺而亦必成禮禮竟而合享之著為定式
似於逝者粗有常制而生者又不可無常訓焉每會畢
除宦遊者不遑考問官守徐圖寄勉其餘士農商賈必
詢其課某業作某田居行某貨學業進而家道亨及安
常生理者則誘掖之誦美之其有頹惰不才驕橫非禮
者勸戒之再三不率將必痛懲之期爾善斯安矣倘終

不悛恐非吾門子弟也然又或別有處焉是會也遵行無怠孝思可謂有永而義訓不為無方泉臺慰血食之休子弟樂中才之養淑厥家而風厥俗不亦善乎噫吾兄弟五人長兄南泉享年四十有一遺孟煥次兄春泉享年七十有五遺之蘭之蘇之范之蔡之琴四弟介泉享年五十有一遺懷慎懷貞懷禮懷明懷遠五弟垂璧享年四十有二遺懷中予今年七十有二子三人慎脩慎幾慎動俱已成立但吾之內外同胞零落已盡而龍

鍾衰老頹然獨存幸年齡之過望顧骨肉之不相及可
勝悼哉所冀吾兒當喜懼之年宜愛日以承歡諸子向
無天之期敦猶父以悲慶趨耄之論恐不足以悚清狂
然垂老之年亦或可以繫骨肉也其恪循之尚期不替

代撰明威將軍匡公墓誌銘

隆慶庚午夏五月十九日詔進階明威將軍署指揮僉
事匡公卒越年冬余將還任京師其孤受爵衰絰踵門
捧同年公弟兵科給事匡君松野所狀行實勾余誌銘

余不忍辭按狀公諱天倫伯仁字北田號也仰遡遙宗故魯匡卜勾須後初寓海州及七世祖以兵徙贛榆之赤澗里祖福者值元末之亂志奮廓清却偽吳元帥之授歸翊我太祖高皇帝茂樹奇績累封東萊副千戶子德移鎮膠州尋以功擢正秩遂世守茲郡德生濟濟生英英生勲勲生允中弗嗣允道以次弟承之實生公焉公賦性穎異器度豁如敬脩厥職忠勇之略不忝先世參涉書史古儒將風烈也屯海上利裕軍需提旅京

師勤勞屢効分甘恤苦士卒樂附心仪的禮以遇鄉人
敦睦宗族惠愛優渥其有負譽自暴者則務規於善嘗
歷圖先像纂製譜牒奕世英風宛然在目豈徒光美前
烈而照激後昆之意殊為深切憫伯父之女於孤貧雖
及其嗣而弗怠全伯母之姪於荒歟終始調恤恒情所
難普濟於無私垂恩於罔報仁人君子之心推而無所
不至者殆不可以縷數也公生於正德丁卯九月初一
日距奄棄之期享年六十有四配吳氏贈宜人繼李氏

封宜人男三人長受爵正千戶三薦武闈一占鄉解總
戎即墨赫然有聲時亦有上之帝廷者竚膺異寵次受
業補弟子員次受誥尚幼女二長適本所正千戶汪士
弘次適士人高一夔孫五人曰持曰極甫成童進學未
艾曰揚曰擇曰拱尚幼孫女八長適本州士人紀國瑞
次適國子生郭景完次聘庠生劉漢嗣宋一魁次聘千
戶應襲劉肇基次聘楊時春餘幼在室辛未冬十一月
二十有六日甲申葬於州之郊南高卓山銘曰

桓桓神武輝昭厥祖仁勇性生帝臣維虎維世之英維
國之楨于朝有紀于鄉有評長眠南畝佳城不朽大樹
蕭蕭攸欽彌久巔如相望白雲渺茫海山休逸萬古無
疆

高麗硯銘

英英紫玉渺渺滄波貞歸華夏契結賢科龍光香靄澤
潤江河登瀛奇選百戰良多補天高節五色靡過水旌
厥信無胥繙磨

宣和硯銘

真確懿質漸磨惟良文林竒品世寶彌光來自宣和其
獲也有隕究自御用其歸也靡常

又硯銘

貞而固也不磷溫而潤也近仁依之朝夕翰墨崇勲磨
之歲月輝光日新允斯文之良友其子孫之世珍也夫

收春先大夫暨先母恭人高氏行狀

先君諱從龍子雲其字收春其別號也世家膠西生而

穎異有奇識鄉人奇之以為先大父未揚之報先大父
諱本字宗源績學種德純雅君子弘治間有司貢禮曹
輒厭奔趨歸願天和因授先君以易學先君甫弱冠義
理精深文詞俊逸金陵沈公鍾督學海上一試大奇之
極加題品才識迥超塵俗稟賦優出倫儕殆鳳毛出色
者也取冠膠庠先叔亦列上第兄弟一日隱然名動齊
魯先大父一喜而殞沈為之震悼命有司禮葬東人恒
為美談我先君居喪哀毀弗勝哭嘔血葬之日先是

祖塋去膠南百里先君狹之迤南百餘步別創新城沙水特秀遂改遷我高祖以我先大父合叙於穆北遷之舉雖有志焉未敢卒議至弘治戊午先君領鄉薦凡五謁南宮不遇辛未以太母夫人就衰乃即銓曹簡判開封水任是寄先君阻絕奸貪大革弊政行所無事水政脩焉始塞荆隆再完銅瓦繼而羅蕡張口之患尋已焉凡三大工皆前括歷歲所難而先君以初仕次第就緒且復隄防疏導民安而運利數十年間皆先君子之力也

專職之外且多造官舫以便度廣脩解署以便公慨包
老之祠歲久卑墮一新煥美神妥而人安之斷獄則公
無私託法無冤民雖異境疑獄莫不懇請當道以趨速
理兇頑無知釋讎息忿皆棄利敦德有藏我先君之主
而報祀者彌久不衰也正德壬申大河南北流賊猖獗
當道殷憂乃於先君倚任不貳兵馬大政一時偕歸早
夜憂遑用圖報稱大購駿馬廣募驍雄旬日之間軍聲
大振且調遣有方輸餉不匱是用勦絕鯨鯢以濟平定

之功又嘗行寓屬邑賊勢突至方經殘破城無完堵先君通夕率理達旦俱興居民賴全河北渠魁裴昆者諸帥攻之久而不下我先君外張兵以窘其勢內遣使以讐其衷不血一刀元兇授首河非以寧撫臣鄧公璋歷試諸助既偕衆以聯揚復特章而超薦其畧曰轉輸効勞督調有策才力既贍勤苦亦多而中丞劉公承華御史陸公鰲李公元皆以賢能交薦六年之間凡五疏焉丙子春擢貳武昌士林歌誦以華其行曰導水疏壅曰

作舟利涉曰平分冤獄曰增壘禦防曰募勇得人曰智
獲渠魁曰轉輸効勞曰督調糾策今猶未泯也度江而
南當道嘉其廉能吏民懷其威德三月之間聲動江漢
丁丑春先以不狎媚悅中傷萋菲拂衣而東士民嗟泣
上下挽不可留侍御王公度有舍斯人其孰與理之嘆
行之日方舟琴書殊無長物來歸海上蕭然灑然黃犢
在故青衿在塾偕三五同志高年酣觴賦詩陶寫林壑
以終天年嘗喜詠未老得閒真是閒及回看官爵是泥

沙之句謂古人良不我誣也隱念宗族之流離貧困者招輯而慰悅之老弱有養壯者有給一身蔭庇靡所不至益恒以祖宗為心平仲文正為法也嘗置一宅第故主悲愴不能舍去輒留之不令遽徙撫諭之久仍益金帛以悅其意有揚州士人自東海來者病瘡窮途垂死蕭寺賙恤生全輿馬遣歸南北美之嘉靖乙酉東方大疫叔父分訓潞庠子病於家不至殞絕者特一息耳先君日夜憫撫哀禱之曰我先君育我兩人吾子有五而

弟惟茲一焉吾老矣復何為願以身代以永弟傳以慰
先人於地下鄉人嘆服叔父之子尋愈是秋先君亦漸
不豫遂卧疴不支鬼神之理雖不可知而先君之疾會
逢其適嗚呼痛哉先君知不可為言念先大父夙愛萬
無一酬泣下交頤顧諸兒曰某初欲搆甲第建先祠脩
古蒸嘗以報先德傳之子孫再欲恪卜佳城移請先骸
哀疇昔之薄葬易今日之美完棄遐邇以時祀掃實
抱區區也更將妥老母於幽宮盡人子之終事豈意垂

白者爾康而我顧先零也惟此春秋窀穸之事兩無一
得送死莫大之故竟莫能及皇天有終此恨不朽茲不
有俟諸爾曹焉矣乎嗚呼嗚呼夫復何言越明年五月
二日子時忽謂吾母曰適有人衣我仙衣指示之曰是
何鮮美也停午卒於正寢先君體幹秀偉丰神英爽天
性仁孝才識通敏理義充然襟度豁如慷慨有古人風
而康濟之志老而不倦博通書史多識物理文章雅健
詩律清古善楷書行草圖畫其騎射百工技藝之事亦

莫不諳曉好音律而不暇於琴命子學之以適古懷不多飲酒常愛醺然談論有章聲音朗徹衣裳有度進退可儀篤愛賓友情如同胞四方知名之士罔不悅契接物則務謙退奉身則欲留有餘勤以持躬儉以垂訓不喜逢迎鄙視齷齪制行之美每為鄉人取則耿介之標絕非塵俗可班也生於成化己丑十二月四日戌時距終之期享年五十有八仕至奉政大夫嘉靖戊子冬權厝介城之北俟先母別議改葬先母姓高氏膠西處士

浩之女也維性貞慧維質淑雅勤以奉我先大父母慎
以侍我先大夫先大父早卒先大母孀居嚴肅我先母
朝夕溫慰委曲周旋未食不敢先未卧不敢休恒恐炎
涼之不攝於時而安養之不適其宜也凡我先子所不
能躬致者舉一身悉之而不遺或謂母曰太夫人早嘗
苦汝留怨乎母曰夫苦我者乃以進婦德以勞阿母罪
也今復以急敬尤罪也吾不圖家世學禮可以懃親乎
甚非所以垂訓表風也日慎一日四十餘年終始惟一

大母臨終之日亦以賢婦歸之從我先君蓬茅中燈火
辛勤久而不倦十餘年相取鄉第二十年從仕梁楚報
國恤民之心未嘗無助早見之明處制之宜堅貞之操
潔素之行先子每有取焉淑子女以禮義貞諸婦以典
法勤儉有恒虔恭茂著家聲有赫於鄉邦懿德不忝於
前烈也嘉靖丙午秋兒完璧應省試白璧較庠首母戒
曰各勉旃以紹汝先志以慰我餘齡各勉旃既而門下
有膺薦者吾兄弟俱未捷母嗟兒之不利而悼已之益

衰因不憚宿疾增劇凡六越月而逝生於成化己丑三
月之八日寅時卒於嘉靖丁未三月九日戌時享年七
十有九制封宜人生子四長良璧讀書未仕先我母卒
娶蕭氏繼娶崔氏孫男一孟煥女孫一適雅士楊憲次
廷璧無為州同知娶李氏生孫男一之蘭次完璧國子
生娶高氏生孫男三慎脩慎幾慎動女孫二長適千戶
楊世芳次適尚寶司丞毛照次白璧庠生娶樂氏生孫
男二懷慎懷貞女孫一生女二長適高密儀宸國子生

次適安丘黃禎吏部文選郎側室姜氏生子一垂璧女
一適諸城庠生張西銘今將遷先君柩合先母葬於城
南完璧不敏不能詳悉先行草述槩略以俟采風者誌
之

故鄉進士直隸和州知州進階奉直大夫行齋
毛公行狀

公諱槃字世用別號行齋世居東萊掖邑之東里高祖
考諱伯全曾祖考諱福英祖考諱敏由鄉貢士任杭州

府學教授俱贈光祿大夫柱國少保兼太子太保戶部
尚書武英殿大學士考諱紀號礪菴晚號海翁早擢省
元舉進士累官光祿大夫柱國少保兼太子太保吏部
尚書謹身殿大學士致仕贈太保謚文簡高祖妣丁氏
曾祖妣王氏祖妣趙氏劉氏俱贈一品夫人妣官氏累
封一品夫人兄棻癸酉舉人順天府推官槩乙未進士
戶部員外郎弟渠亦以省元登丙戌進士任太僕卿業
治儒術未第俱先公卒集官生都勻府知府公天性嗜

學弘治丁巳甫六歲即欲從兄治業文簡以冲斬竟弗
已比長慨然欲盡友天下士德業日益茂正德庚子以
儒生應試補員府庠及弱冠文簡愛攜宦邸學易於汪
東麓太史領其微奧發為文詞彌無尚焉嘉靖壬午大
中丞浚川公督東士閱其文以偉士竒之是秋領鄉薦
凡六不偶於春官辛丑春文簡書諭有命且又致爾年
我暮之警及是亦顯揚之道公得書志以命制遂謁天
曹授守泰倉編氓當海寇初平流移未定公推誠興發

曲為招來復安如昔州東境舊築堤數里用虞潮汐厥利維深歲久駁夷茲為民患公毅然增修不擾而蠶萃宛然士林贊永賴焉壬寅文簡公壽登八袞聖天子篤念元老馳遣撫按官及門存問公荷主懷親守官雲望將圖海岱長春之慶維時文衡山朱玉峯太宰洎吳下縉紳且繪且文以從歡祝遣延照子恪致遙壽張天恩慰庭怡誠一時忠誼仁孝之盛癸卯侍史周公南疏薦畧云純誠篤慎練達老成除奸弊而事克有濟理海虞

而民利無窮遂調知和州蓋移簡就劇彰德辨才也行
之日迓以來蘇留以去思道路相屬得民若茲亦鮮矣
及視和城闥故存雉堞樓櫓已就凋敝公曰預備不修
何以待暴非政也殫心力懲苟且不再踰月頽者興敝
者煥矣和人慰維新之仰初文簡蓄文稿二十六卷歸
田集識二卷聖朝存問錄二卷久未傳播雖文簡不欲
彰人而人未嘗無探珠之志也公勺序於徐崦西少宰
捐俸梓之文簡手書與其顯親繼志之一端甲辰公入

覲傾境遮留相與歌誦不盡懷私侍御舒公汀疏薦畧
云性資老練事務精詳真實心以愛民堪任重而致遠
復改西陝之乾州蓋掄才試用倚効邊籌也居無何公
以塞程嶢嶮耄親耆隔高志訃于盛時孝誠違於西日
輒解組浩然以東慕乎乾者亦猶慕乎和與泰也琴鶴
以隨渺聞長物會太僕都勛二弟咸以省還金紫相慶
鄉人以古萬石榮之越明年乙巳夏文簡翁不起公獲
侍屬纘咸自盡焉公可謂有感有見也尋與二弟謀請

卹典悉獲如制戊申建祠寢東遵禮奉祀公傍徨祠墓
間永慕弗替冢子延照以恩授尚寶司丞考績進公奉
直大夫制詞有世家宿學科目流英仕罔玷於官箴居
克敦乎鄉行之褒公稟受靈淑雖抵暮氣鮮失平庚申夏
偶櫻微疴即不就砭藥至五月二十有七日寅刻處正
寢神閒氣定無亂無惕從容以還元化公生弘治壬子
十月二十有七日時距終期享年六十有九配雷氏贈
宜人萊州衛指揮勲之女也前二十有一年卒繼王氏

封宜人廣西南寧府通判廷臣之女側室姜氏子男三長延照尚寶司丞次延慧次延炯俱府庠生女五長適萊州衛指揮張棟次適平度州國子生崔旦餘幼孫男三長引增次引墳次引來俱庠生女孫三長聘萊州衛指揮王道男梓餘幼曾孫男一鉄曾孫女四公孝友夙成事親曲盡其道雖宦遊異土時獻不爽約以自奉享祀致涓篤愛宗親終始不衰晚年與季弟集偕休林壑觴詠陶寫琴瑟好合王謝高風非塵庸所知垂訓以善

繼居官以清慎恭無諂和無驕人咸慕之守有先廬扁
堂裕慶郭田百畝他無厚蓄清白世紹無改焉每春秋
掃祀躬率諸子若孫禮成齒序文會盡歡而返居暇則
坐一室圖書前後日夕潛泳隨筆詞章不事雕飾渙理
可愛著有行齋手稿數卷藏於家善行書有晉風公鴻
筆懿行媲美前脩不幸制訃禮闈擬古則過人遠矣况
位刺史壽古稀蕭散谿壑歷久完名無異議公亦人所
難矣哉某舊以通家兼忝葭莩其世系事業粗得攷聞

今葬且有期始掇其槩畧僭為狀託立言君子圖不朽焉

海壑吟稿卷九